

吳文節公遺集

吳文節公遺集卷四十九目錄

公牘

批永新縣詳賀鑼鼓被追跌死由

批鹽道詳駁船淹消引鹽由

批南城縣詳訊結硝石卡獲送私犯張得賓由

批峽江縣詳審結鹽犯由

札芙蓉良口朝陽三卡員弁緝私由

批吉水縣詳獲私犯訊供由

批宜黃縣王邦俊呈訴子婦不孝由

批新建縣詳駁船遭風淹消引鹽由

身不... 卷四... 目金
批萬安縣詳許廷松受雇挑私由

批

臬司鹽道

會詳萬安縣民買食私鹽由

批

鄱陽浮梁

縣會詳訊辦東港卡員稟段明得等拒搶

由

批南安府稟調兵圍捕逃兇逃匪由

札吉南贛甯道轉飭捕匪由

吳文節公遺集卷四十九

男養原謹編

公牘

批永新縣詳賀鑼鼓被追跌死由

此案據訊該犯黃成珠因賭輸錢欲圖翻本賀鑼鼓不
允爭鬧攜取錢袋跑走該犯隨後追趕致賀鑼鼓跌入
泉池磕傷殞命查泉池卽在庵右當賀鑼鼓被追失跌
之時自必疾聲呼救其時僧長魁等均已走出廟門何
至皆無聽聞卽該犯黃成珠當時聽聞水響亦僅料知
賀鑼鼓跌入泉池尙未知其卽死何以卽行害怕不向

僧長魁等實告趕往救援而乃捏詞掩飾又不卽逃避
仍與僧長魁等進廟坐歇已無此情理迨該犯私向黃
菖祖告知前由而黃菖祖亦卽默然不往查看更不近
情現訊各供顯未確切應再澈底根究仰按察司卽飭
再行提集犯證悉心研審實在如何起衅爭鬧追趕失
跌磕傷身死究明是否推跌有心致斃當時各犯因何
俱不往救有無別故務得確情按擬招解毋任顛預率
延切切仍候督部堂批示繳

批鹽道詳駁船淹消引鹽由

查涂招發船裝引鹽旣係撞破沈溺並非被風打散當

時艚載鹽包不難搶救何至驟被淹消至八千三百餘包之多且鹽係沈溺淹消並非漂散鹽斤縱使消化而空包均應在艚不至短少何以該縣等前詳原勘艚內空包僅七千餘箇與所報淹消之數不符其爲偷盜售賣無疑卽所謂七千餘箇空包者亦祇紙上空談耳至汛兵卽係夥同盜賣分贓之人尤未便據其所供卽以爲證總之此案必須澈底查究仰鹽法道卽飭將淹消空包解送點驗一面由道親提該船戶人等再行研訊確情據實詳辦該縣等銷數旣日行短絀遇案又百計消弭該道亦何便而必爲之徇飾耶不可解矣仍候督

部堂批示繳

批南城縣詳訊結硝石卡獲送私犯張得賓由

該兵役並不查緝窩囤大夥私梟而於街市耳目狎習之雜貨店缸餘存斤餘之鹽指爲私鹽妄拏其爲藉端訛索可知該卡文武員弁亦如聾如瞶藉報獲私一起實屬不知羞恥似此設卡派官帶兵駐緝於疏引毫無裨益而徒爲閭閻之害若不分別示懲則該員弁等竟思以過冒功於緝私殊有關係仰鹽法道會同按察司卽將該卡文武員弁各記大過二次分別移行註冊飭遵爲不知羞恥者儆仍勒緝大夥私梟以觀後效兵丁

周文秀杜仁卽開革名糧不准復充餘如詳飭遵並飭該縣不得因此案如此辦理遇有真正梟私或又意存消化致干咎戾本部院權衡功過一秉至公總期事有實際斷不任畸輕畸重也並錄批報明督部堂仍候批示繳

批峽江縣詳審結鹽犯由

該犯彭登珍因國私售賣經委員當場拏獲前據稟報卽經本部院批飭嚴究夥黨姓名及私鹽來蹤去蹟一跟追拏辦不可含糊率結在案緝私員弁及地方文武輕易不能查獲窩囤積梟今獲此一起正可從此嚴

追梟徒蹤蹟夥黨姓名一一拏辦乃又以初次販私代稱等情一派混供草率具詳只知將就了事全不以地方公事爲重不知該縣是何存心可惡已極仰按察司會同鹽法道嚴飭確審因私轉售實情追究夥黨按名查拘到案訊取確供據實通詳核辦儻再顛預遷就稍有不實不盡經本部院提省審出必將該縣嚴叅凜之凜之仍候督部堂批示繳

札芙蓉良口朝陽三卡員弁緝私由

爲札飭遵照事案照閏七月二十八日據龍母廟卡文武員弁稟報拏獲窩囤私鹽一起雖鹽僅一千餘斤犯

亦不過彭登珍一人惟能訪緝窩國辦理實中肯要本院已心嘉其得力今閱峽江縣旬報摺開閏七月下旬居然銷至六十五引有零幾幾足額並下游之新淦縣閏七月下旬亦銷至五十六引有零均爲從來所未有可見緝私認真斷無不見效之理除該卡緝私文員楊逢新武弁唐應魁柳永青應各記大功二次以示獎勵外該芙蓉良口朝陽三卡員弁何以全無愧奮徒知弄巧行詐或躉報零緝或勻期分案甚或越界妄拏被人毆辱轉至賠禮還鹽種種醜態實屬無能無恥天良喪盡此後儻再不振作仍以搪差爲得計或反藉口於官

鹽不到是該員弁等自棄功名本院亦末如之何也已
爲此札仰該員弁遵照榮辱均聽自取勿謂本院言之
不諄切也特札

批吉水縣詳獲私犯訊供由

查劉沅保旣據訊係無辜應行釋放其餘各鹽犯應再
嚴切根究仰按察司會同鹽法道速飭遵照卽將劉沅
保先行釋放不可拖累一面提犯再行切實根究積慣
興販次數及私鹽來厯運往何處窩囤銷售務得各確
情據實按擬詳辦不准含糊輕縱並不許任犯狡供親
老丁單爲之開脫該縣等惡習深錮該司道等務卽飛

檄嚴飭毋致案案待駁致多費筆墨甚且提省滋累要
要至把總江文烈巡緝得力應予記功一次並卽轉移
註冊飭遵仍候督部堂批示繳

批宜黃縣王邦俊呈訴子婦不孝由

天下無不是之父母王邦俊之子王兆元雖經出繼究
爲王邦俊所親生自應在家侍奉乃竟偕其妻黃氏潛
匿岳家終年不返甚至王邦俊往接亦不回歸忍心害
理爲人子者豈宜出此伊妻黃氏長住母家且圖分產
另居卽屬不事舅姑有干七出黃玉諧身列成均其子
黃經腴又係附貢均非鄉愚無知可比乃不以正理論

勸其女與壻使盡孝道反挺身代訟爲之爭奪家資情
尤可惡旣經臬司批府提訊仰撫州府速卽提集訊明
詳辦毋稍刻延抄粘並發

批新建縣詳駁船遭風淹消引鹽由

據詳水深一丈七八尺其非淺渚漫灘可知豈有此中
泓水底忽然生出樹椿之理明係該船戶盜賣鑿沈捏
報押駁之人串同分肥毫無疑義現在下游各屬引鹽
銷數短絀半係此輩所誤必須嚴究懲辦何可泄縱顛
預了結仰鹽法道嚴飭提集該船戶等研訊確情據實
究懲另詳察辦斷不准稍任捏飾仍錄批報明督部堂

並候批示繳

批萬安縣詳許廷松受雇挑私由

江西各廳州縣審辦鹽案往往不肯從實非稱各犯零賣卽稱受雇挑馱而於私鹽之來蹤去跡寄囤之窩戶積梟概置不究任令劣書照依舊案鈔襲描摹僅就現犯顛預定一徒罪朝配夕逃不旋踵而仍爲私販遂至毫無忌憚該署縣曹令平素辦事尙肯認真萬安官引之滯私梟之多爲通省之尤該令當極力整頓何以辦理此案亦以許廷松撞遇鹽客郭天純受雇代挑另獲二擔並非同夥等詞就現犯含糊敷衍草率詳辦不思

逸犯郭天純既稱鹽客必係積慣梟徒該犯許廷松既
悉其籍貫姓名必非偶然受雇即使受雇實係真情亦
當研訊私鹽來歷及運往何處寄囤銷售窩戶何人一
一拏辦因地制宜嚴示懲創乃亦照舊案描摹遷就依
樣葫蘆大屬非是仰按察司會同鹽法道嚴飭提犯再
行研審實在是否僅止受雇挑私抑係同夥與販究明
私鹽實在來歷及運往何處寄囤銷售跟究窩戶姓名
同供出私販郭天純一併嚴拏務獲據實究擬詳辦毋
得稍涉含糊顛預輕縱致干叅咎切切仍候督部堂批
示繳

批臬司會詳萬安縣民買食私鹽由

此案嚴蘭芳在百嘉地地方買回私鹽中途被芙蓉卡
兵役拏獲明一販私梟徒若謂買回自食則該縣境內
徧地皆私該犯又何用向別處買回耶該縣前詳含糊
率結顛預開脫當經批司會道飭再另審另辦乃該縣
狃於積習不肯實究仍以前供前擬頂詳請結謂已研
審明確並無捏飾該司道或能信之本部院實信不過
也仰按察司卽會同鹽法道將犯提省親訊究懲另詳
察奪該鹽法道日日惟銷數是求而案案將私匪輕縱
何異卻行而求前耶務卽振作精神毋畏積重之難返

毋徇有司之錮習是爲至要此繳

批鄱陽浮梁縣會詳訊辦東港卡員稟段明得等拒搶

由

此案前據東港卡委員王祐之等稟報在小港地方拏獲私鹽二擔運過三壠街地方該梟徒糾聚數十人持械拒搶捉獲梟徒段明生等三名移縣究辦等情當經批飭研訊在案茲據詳段明得卽段明生等因船載柴塊行至三壠街河下水乾淺在河築壩聽聞岸上官兵拏獲私鹽上岸觀看因見兵役未戴紅帽口稱恐是假冒緝私要將私鹽阻留被兵役心疑獲解等語不知

段明得等果係裝柴船戶阻淺方用力弄船之不暇何暇上岸閒觀縱使屬實兵丁之是否假冒與彼何干輒稱將鹽阻留此而猶得謂之非梟棍耶該縣等官引旣不能疏銷偶獲一起鹽犯必視之如好友如恩人一般千方百計爲之開脫而又故示嚴切強科一紙上空談之罪名計欲關本院之口而形本院之刻此等伎倆本院恐尙不至爲所欺也該縣等旣不肯實心辦公本院亦不屑教誨卽以銷鹽一事先課之截至六月止鄱陽縣不能將半年額引銷足浮梁縣不能於半年額引外溢銷者均必予以叅處所有此案卽飭饒州府親提確

訊至地保皆係梟棍護符先當嚴審治罪尤不容任其
扶同捏飾仰按察司會同鹽法道飛飭饒州府遵照親
訊確情據實詳辦不准委審一面督拏各逸犯務獲併
究毋任延縱切切此繳

本院遇事力求實際正遇事力矢虛衷從不敢執偏見
設成心也卽如上年廣昌卡弁妄拏誘責據廣昌縣將
實在情形縷稟經本院飭委建昌府親詣訪查提訊確
實未嘗不立釋無辜而痛懲營弁也乃若該鄱陽縣所
辦不核事之真是非消弭情弛之習既深錮於中而又
妄加以揣摩調停之見以此治事事安得有是處令人

忿激仰並飭饒州府知之又加批

批南安府稟調兵圍捕逃兇逃匪由

昨據署大庾縣章令稟五月十五日至新城已謁晤該
守十六日信豐張令亦至彼茲查該府之稟係十六日
繕發何以云張令尙未到郡此時想已到地會商矣至
蔡雜各姓應拏首要各犯多不過數十名其脅從附和
之人雖多仍皆良民也其兩造紳耆族長之畏首畏尾
者非迴護也畏挾讎報復耳當原其不得已之心何不
將應拏各犯開明手摺密向兩造紳族等隔別詢問其
住址年貌蹤跡分別孰較難拏孰較易拏酌量情形輕

重次第布置仍當以役爲先兵次之此事不過緝捕逃
兇逃匪非勦賊也更非打仗也三營挑備之兵所以養
威示重也該府擔承重大本院亦先惟責成該府一人
務宜慎之又慎一則因獸猶鬪當防反噬一則玉石難
分當防波及萬不可孟浪從事急脈原有緩受之法一
面布置拏犯一面卽向該紳族等爲之梳櫛衅由從容
辦理不必刻期就緒亦勿思一舉課功稟中之所謂帶
械防捕及聯絡貧傭者皆非能持久者也此時欲使畏
而知悔似難久則彼必困而求通次第去其羽翼自逐
漸披其腹心我不先發彼亦不敢妄逞燭此關鍵庶有

把握該府其知之慎之密之此批可與信豐張令同閱
此繳示稿存

札吉南贛甯道轉飭捕匪由

爲密飭事照得南安鄧守前稟查辦大庾縣蔡雜各姓
命搶積案一事當將該守原稟暨本院批示鈔錄函知
並將委員備兵籌費各事宜節次檄飭知照在案昨據
鄧守稟出示曉諭犯多頑抗陸續獲犯七名須調多兵
兜擒等因又經將該守原稟暨本院批示鈔錄函知查
此案前據鄧守初稟請飭參游大員帶重兵往辦本院
卽覺於事體不宜且亦不值批斥未爲盡善是以從其

後一說委員會辦示以搜查掩捕兜撲責成家族購覓
眼線各辦法聽其隨時酌辦並酌派南安本營兵丁一
百名助其指揮仍令先行剴切示諭冀有一二悔悟之
萌也而卽籌備經費一千兩之多者使其懸賞購線諸
凡辦理寬裕不致掣肘也又必挑備贛左贛後南安各
營精兵數百名者使其引而不發聲勢壯盛防匪徒之
先逞強滋事也乃該守並不善爲體會現旣獲犯七名
不知從容相機乘便亦不候委員會商徒以兩次出示
曉諭家族不能捆送匪犯不肯投案遽請動撥多兵爲
圍捕之計殊不知此等案犯若能於一二次空言示諭

之後卽俯首聽命是不得謂之爲頑獷矣官若以示諭
不遵卽以大兵壓之不計得失收發一往直前是此案
亦不爲難辦矣且據稟內稱蔡雜各姓相距二十餘里
兵少不敷調遣等語試問欲將二十餘里四面兜圍非
數萬大兵不可且古人卽臨敵勦賊亦尙有聲東擊西
避堅攻瑕變化因心之用斷無合圍之理况兩造積案
兇匪總不過數十名其附和者皆冥頑無藉之徒耳將
舉而盡殲之乎抑舉而盡擒之乎勢不能亦理不必也
該守於兩造從何造下手或兩造齊下手從何處何人
辦起或從其所聚而撲之或伺其分散而截之並未能

一一等畫周到含糊函莽辦理殊屬紕繆本院昨批示
內詢問紳族一層實爲扼要推之購線買水皆良法也
看來該守年少氣盛易於動火且恐不免欲速之見有
粗無細本院殊深懸悵不知此等案當耐煩耐勞耐久
耐氣耐繁耐搖撼漸進堅持方能有濟譬如受病已
深臟腑業已受傷驟投以稍黃峻劑不債亦罔耳攻陷
之藥自不可少要必主以滋培仍須佐以和解乃可耳
仰該道卽遵照轉飭知之並飭張升令知之至鄧守現
稟內有卽係遵照本院批諭前撲後兜辦法但現既有
兵一百名役二百餘儘數兜撲何求多爲該守有稟請

調發備兵之處該道不得率准要要再此項文件須密
繕密封專差面投儻能抽空將鄧守調贛當面授以機
宜更妥此中關鍵不獨不可使一人間知無論官民弁役並飭
該守等不可稍露神色愼切愼切此札

吳文節公遺集卷五十目錄

公牘

札吉安府密查廬陵縣官聲由

批署瑞州府稟請獎勵屬員多銷引鹽由

批萬安縣稟請將私梟移歸犯籍審辦由

批廬陵縣稟請僉商設店由

批廬陵縣設立鹽店由

批萬安縣接濟官鹽由

札藩司交代章程由

札臬司截留軍流人犯章程由

吳文節公遺集卷五十

男養原謹編

公牘

札吉安府密查廬陵縣官聲由

爲密札飭查事照得昨據廬陵縣婦人劉李氏呈控劉永瑞父子挾讎唆使彭鵬章將其弟彭騰章自溺命案誣告該氏夫監生劉象賢殺斃該縣拂慾刑燬勒招該府擲詞不收又稱該縣將氏夫別爲出示招告等情具呈到本部院除呈批發該府親提詳辦外查民間借假命案拖累訛詐最爲閭閻之害本院方汲汲欲爲百姓

挽回風氣若貪官藉此苛婪更何可一日姑容此案係
七月之事會據該縣於旬報摺內開呈延今五月之久
該縣並無一字詳報劉象賢既係監生亦未據該縣詳
革而遽事刑求種種形跡已大屬可疑且劉象賢命案
果實自當收禁辦罪何待另行招告若命案既虛則劉
象賢係被誣之人天下豈有武斷鄉曲之人而旁人尙
敢誣扳者耶惴惴支離尤屬費人思忖該廬陵縣富令
本係有用無體之人此等作爲本院實未敢信心爲此
手札飭查札到該府卽迅將此案大概情形及富令平
日官聲詳晰密稟察奪該府爲親臨上司近在同城旣

不能諉爲不知斷不可絲毫徇飾不獨責有攸歸咎無可諉且富令果如此行爲遲速終必敗露到敗露時該府自返受本院如此委任其將何詞以解也思之慎之火速切速

批署瑞州府稟請獎勵屬員多銷引鹽由

江西省行銷淮鹽遞年缺滯不能起色本院刻刻在心何縣溢銷何縣缺銷本院知之久矣何勞該管知府代陳該府屬之上高縣向係暢銷之區溢銷本非地方官之功道光二十一年五月間裕前部堂以該前縣高令十八九年溢銷均在三倍以上

奏請

賞加同知銜以昭激勸嗣復悔悟其非故於是年七月復准咨會以江廣口岸情形不同有向係溢銷之處亦有向係缺銷之處若不核實比較則向來溢銷者竟可坐待保舉應自二十一年起如向來溢銷之處比較歷次溢數相等係屬分所應然若溢數較少卽屬惰悞如能加倍增多自當酌加保舉等因轉行遵照在案今據摺開孫令二十三二十四二十五等年溢銷之數均不能如高令十八年溢銷之多何可言功乃該署府率謂高令奉前部堂

奏懇加銜並蒙調署優缺請將孫令援案辦理豈不知
裕前部堂有續議乎抑知之而姑以此欺本院乎該丞
委署知府於應辦之事並未一辦而轉以此等貪天爲
功之事嘵嘵陳請意欲見好屬員且自謂有考核屬員
之責不敢沒其微勞云云正襟莊論真可謂不值一噓
者矣除所稟毋庸議外仰鹽法道卽會同藩司嚴行申
斥並錄批報明督部堂仍候批示繳摺擲還

批萬安縣稟請將私梟移歸犯籍審辦由

查吉安府屬之粵私縣縣皆有私犯縣縣皆彼此可以
侵充朝東暮西出沒無常若必拘定犯事犯籍界限辦

理則不肖之地方官必且畏難庇縱而駐卡員弁亦得藉口不敢越界觀望遲迴捕務尙可問乎此案鹽犯蕭全瑞等無論在何縣犯事在何地方被獲既係該縣會同該邑卡員拏獲解歸該縣收審該縣卽應迅速研審詳辦乃以上年臘月間獲犯之案遲至今日不訊不究忽謂該縣非犯事地方託詞稟請解歸龍泉訊辦此等巧宦蒼猾伎倆不意該令屢蹈之不意該令敢於本院前屢施之也此案人鹽並獲又係該縣會同卡員等親往督拏非平常兵役等零星拏者可比犯人何能狡賴問官有何難審何所用其傳訊地鄰其在逃之窩戶

匡典雲等自可另緝另結本案何必因而牽制凡此皆遁辭也該令直未嘗一經心一訊供耳若似此易訊易結之案該令竟不能審出實情則該令亦太無聽斷之才豈尙足膺民社耶所有此案著不准移歸龍泉縣仍責令該署縣速審限十日內究明具詳不准刻延仰按察司會同鹽法道飛飭遵照此繳

批廬陵縣稟請僉商設店

據稟前此僉商立店數年銷數及停撤商店以後銷數並停撤商店時商稟謂試行三載銷數仍未轉暢云云所議實屬未確等因查商人惟利是趨旣已引銷課裕

自必獲利無疑何以正當獲利之時忽戛然而止其中必別有緣由該縣未之知耶抑知之而匿不言耶至設復商店本院久經飭道籌議不待該縣之稟請也乃該縣忽有此稟者豈以本院疊札嚴飭各該縣緝私督銷而姑以此爲藉口諉卸之地耶審爾則大誤矣卽如廬陵一縣不下數十萬烟戶而現在銷數僅僅如此百姓果能淡食耶蓋私鹽之爲害也查私鹽出境入境地方文武均有應得處分豈任其瀾漫充斥而可以告無過乎仰鹽法道一面據稟確切查核如果必須設復商店及設店後如何絕去弊源之處妥議通詳候會商督部

堂

奏明僉商辦理一面仍嚴飭該縣緝私躉銷不得以懸擬之功效冀能免於目前之責成也儻因有此一稟遂置緝私督銷於不問使銷數仍無起色則是有心巧抵較之僅止不能緝私督銷咎出公罪者不侔矣勉之凜之此繳

札廬陵縣設立鹽店由

前據該縣稟請設立鹽店意在運貯官鹽以便零販就近轉售現擬由省委員運鹽前往由官經理不經商手以期恒久杜弊惟貯鹽之倉須整理看守堆扒之人須

籌畫所有該縣舊存鹽店公所一區除火燬外倉房是
否尙完整能貯鹽若干應否稍爲苦補委員食宿之所
是否尙完好其收發鹽包兌收銀兩自應由委員經管
其看守司啟閉之人必須雇本地方人地方官不時約
東方好約須長工幾人月需工食若干堆扒之人全雇
長工未免閒時多而糜費重或平時專雇數人上鹽時
另行加雇專雇者約月需工食若干加雇者臨時如何
給值至現在吉郡鹽價若干確實訪明勿打官話將來
官鹽運到仍照省埠之價發與零販須使零販有利可
沾方能踴躍民間食戶亦應准向官局整包用銀購買

方可推廣以上各款均須先事計定方免周章合行札查札到該縣迅卽親詣公所勘驗並將各條悉心詢訪妥籌確計逐一開列清摺具稟察奪儻有未盡事宜札中疎漏未及者亦卽一併稟陳以憑酌核速速此札

札萬安縣接濟官鹽由

照得該縣官引滯銷係由私鹽充斥因私充而官販不到百姓卽欲食官鹽苦於無買處此亦情勢所必然也昨據該令稟稱現在自行發價赴省買鹽運回轉銷是私鹽固當竭力嚴拏而官運亦須設法接濟現在本院已札飭鹽道擬由省委員發省卑之鹽徑赴該縣交與該縣轉銷委員將鹽交清

卽回省銷差該縣俟鹽銷售後或銷及半時卽將所售之價迅遣妥丁備文齎赴鹽道衙門投收一面仍由省委員發鹽運往如此輓轡委輸自不患官鹽之不接濟矣且引路疎通水販亦得源源自運惟現在該縣鹽價實在若干將來省鹽運到計鹽價及水腳每包合本若干照本發販絲毫不得加增必使官運之本不虧而零販之利自在庶可行之有效且現在試行約略每月可銷若干數亦須核計合行札查札到該縣迅卽悉心查訪逐一具稟申覆以憑核辦速速此札

札藩司交代章程由

爲札飭事照得江西各屬交代延壓甚多前因訪知各屬有以虧短之數浮估民欠掇交流抵藉詞延挨滋弊無窮當經札司通籌確核清源截流嚴立章程飭遵具覆在案迄今兩月未據籌議詳覆本部院因思各屬應完藩道二庫錢糧如果徵解之數相符交代何至糾纏卽催科亦何至遽干吏議其受病殆不可問亟宜定以簡直易行章程以期稍截其流著從本年三月起凡各屬交案所有已徵正款毫釐均須清解斷不准以他項作抵縱使已徵未解之數僅止銖兩而他項有盈千累萬之多亦分毫不准作抵儻授者濫行接受府州濫行

結報經本部院察出卽將該管府州暨監盤官及前後任一併以串同侵盜錢糧叅革治罪斷不能稍爲寬假也且思各州廳縣一經到任前官徵過地丁屯銀等若干數均有紅簿可稽曾否完解亦有批解稿卷及藩司批迴等件可核無難一查而知嗣後各官到任無論正署均於接印後五日內先將前任某官任內徵得錢糧若干曾否全解或已解若干欠解若干勿論年款但查明總數分別已未完解開呈藩司暨該管府州該府州接稟後卽日覆核分稟司院查考此係按籍可稽不待清算而片刻可以核辦者儻接任之員不於五日內稟

報或該府州不卽日核稟卽先以不遵章程有心扶飾
列叅亦斷不能稍爲姑待也如此辦理庶各官任內有
無虧短旣得速行查核交代自易於清算庸鄙狡滑之
員亦不敢藉詞長餘公然混抵矣合特札飭札到該司
卽轉飭一體遵照至已往者如何清源該司仍遵前札
速行核議具覆此札

札臬司截留軍流人犯章程由

爲札飭事照得現在欽奉

恩旨查辦各省軍罪以下人犯分別減等其各省徒罪
以下及軍流未起解人犯均由各本省辦理不致參差

惟軍流在道會

赦一項沿途旁午辦理每難畫一其實軍流一減仍有
徒罪仍須遞回原籍再行定地發配現在江西省遵照
向章以奉文後各縣遇有外省遞到軍流人犯卽由該
縣查明不准減者仍照常前進其准減者卽由該縣逐
站遞回俾得早到原籍定地辦理是查辦似緩於前而
較速於後也湖北省現亦查照向章以奉文後各縣遇
有外省遞到軍流人犯由該縣查明准減者卽由該縣
截留申詳上司辦理減等等因而辦減後亦仍須遞回
原籍定地發配是查辦似速於前而又稍緩於後也異

曲同工均無軒輊均期推廣

皇仁俾罪犯得速霑

恩澤也至各省交界縣分辦理亦必須無窒礙卽如現在魏四一犯經湖北撫部院指飭黃梅縣令卽截留查辦自屬徑捷妥速免致展轉推諉辦法惟此一二犯黃梅縣尙可留辦若各省遞回者多恐黃梅縣亦實不免擁擠之虞似不如分別辦理庶期無誤總之在徑行遞回原籍之省宜迅速轉遞勿延在截留查辦減等之省如遇從原籍遞來尙未出境之犯卽按章截留查辦若係先經出境嗣復遞回之犯卽照上站來文亦逐程遞

回原籍查辦似此以犯之從原籍前來從中途遞回爲分別截留不截留之界並行不悖則旣於各省定章不紊而各首站監獄亦不至擁擠各罪犯亦均得速霑

恩澤較可通融無滯且粵閩浙均未有來咨均未知如何辦法江西省入界各縣亦須畫一飭遵合行札飭爲此札仰該司立即確核妥議詳請分別咨移辦理至由粵閩浙甫經遞來之犯各該縣查明准減應行遞回者不得錯遞前進以致誤混出境貽累鄰封其不准減等之犯無論本省不准混行退回儻鄰省解到亦不准混行推阻不收以上二條如有蹈犯者該司卽指揭嚴叅

勿稍姑貸要要此札

吳文節公遺集卷五十二目錄

公牘

曉諭軍民示

頒行各屬條約

南新二縣官鹽用三聯照票說帖

清理鹽課津貼織庫欠款說帖

勸捐賑啟

再勸捐賑啟

吳文節公遺集卷五十一

男養原謹編

公牘

曉諭軍民示

爲曉諭事照得

國家刑律之設所以教民非以苦民也教民者禁之於未然使爾民凜然知刑法之嚴遷善遠罪而不敢爲非也惟律例一書卷帙繁多民間豈能習見周知本部院責任撫綏當爾民旣犯刑章斷不能廢法而曲貸之未嘗不憫其無知而哀矜之也因思治之於旣犯曷若教

之於未然除殺人償命及盜竊搶奪發塚放火諸罪名人所共知亦人所共戒者無庸開示外茲就律例中罪名甚重而無知鄉愚往往易於干犯者摘錄簡明條例列款曉示爲此示諭爾軍民等務須父誡其子兄勉其弟共敦孝弟共習禮讓懲忿息爭安耕鑿而長子孫終身不至公庭此則爾百姓之福也亦本部院之所厚望也

頒行各屬條約

一服制命案必須研鞫確情核實究辦不准摹仿成案生吞活剝以並非有心干犯故爲開脫儻再不知虛

衷研鞠顛預遷就提省審出實情卽將該員指叅斷不能以隨同審正爲解免也

一火器殺人最爲慘忍地方官平時旣不能實心化導廣爲收繳遇案又復顛預故縱其情尤不可恕嗣後凡有火器殺人之案務須確訊實究不准率以震動火機避故殺之例爲生者開脫致死者含冤違者必叅

一自盡之案屍親藉屍刁告藉圖訛索最爲江西惡習地方官必須遇案嚴懲力挽頽風方無忝父母斯民之責乃本院察核各屬於此等案件均必遲至半年

後或八九月後始以一詳了結藉詞於催傳見證甫到及屍親病痊到案供明具結呈悔等套語含混牽結此等伎倆本院窺之審矣不過闢冗因循畏難苟安寬其時日縱令書差訟棍屍親等擇肥而噬迨若輩賄飽意闌而官轉爲之牽率彌縫豈非助惡長奸耶且此中稍不自愛之員或竟有串授分肥之處聽言信行本院實不能無戒心焉自此以後各該屬如遇此等案件計至一月尙不出詳者本院核扣日期卽以玩視民瘼專摺嚴叅卽官聲素好之員亦不能倖邀寬假也特此諄切告誡言在必行稟之慎之

屍親

鄰證均當場可以取供者如果地方官隨報隨驗有何患病外賓不能取供之有再有以此託詞者卽屬有心
弊混

一命案全以屍傷爲憑地方官儻稍爲偷安惡穢輕以無憑相驗爲詞則訟棍從而生心屍親因而逞刁種種譁張必至案多棘手且至屍遭蒸刷自此以後除時逢盛暑計程在二百里外計期已六七日後實在屍腐難驗者准其聲明外儻時令程途日期有一不然而輒以無憑相驗申詳者則是該地方官並未隨報隨驗捏填日期否或養安自適並未親見屍身任聽書仵等故埋案根捏稟弊混甚或庸懦無能當場

爲一等刁惡屍親攪鬧不敢相驗而聊以屍腐虛報者凡此三途登諸白簡尙有何詞耶凜之勉之毋貽後悔

一搶竊及強刦之案無論賊數多寡及有無傷死事主之事均須照例隨報隨詳乃各屬往往有遲至半年數月後俟案犯少獲始行通詳聲明正在詳緝間適差獲犯云云儻不獲犯恐遂不詳矣叅緝之罪公也諱匿之罪私也該地方官其慎擇而審處之勿爲謬論所惑自蹈莫挽之咎也

一搶竊賊多之案往往任意短估必使之不逾貫而後

快縱盜殃民陰德非此之謂也務卽破除銅習實力
整頓江省盜風未熄本院惟於地方官責成儻有案
不破破案復不實辦是甘心廢弛矣試問能姑容乎
否乎勉之慎之

南新二縣官鹽用三聯照票說帖

大凡欲作弊之人及未肯實心求益之人無不喜其法
之繁繁則立法者先有倦心及行之而迷離趨避莫可
窮詰矣凡事類然况鹽務之尤糾纏者乎似不如一切
之法之尙可把握也此案有領票之十二家又有未領
票之十二家又有零售之一百二十三家或立三聯票

或立二聯票或既立二聯票又立三聯票紛紛名目閱之已覺眩人行之安能就緒僕意此二十四家此一百二十三家此醬園作坊均須向公櫃買鹽乃現行之事也而三聯照票亦係現行中之所有也何不一律通用三聯道印照票將二聯等票全行裁去以首幅填明各項仍用紅戳注明二日外即作廢紙不准護運裁付買鹽之人限五日繳回公櫃查銷買鹽者時須輪向公櫃交易繳以中幅亦填明各項即由公櫃徑繳南新二縣日日賣鹽即日亦可繳或南新二縣按旬繳道稟院即銷數也以末幅存公櫃備核如此徑捷立法書之於紙數行而了見之於事數語可達何必累牘

糾紛徒取迷悶耶要之此不過先將南新二縣實在銷數清出免致藉口銷多得少無憑考核爲他人所影占耳至如何督銷如何緝私地方有司尙有許多事在非此一訂章程遂可逸而收效也其旗商之夾私子店之影私江船之腳私駁船之盜私外來之梟私設法破獲窮究嚴懲並不能一日鬆勁也其實如此簡捷立法於公櫃則核賣數於一切子店但核買數而其轉賣之數置之不問似乎稽查疏漏然已責成有歸所謂拊其本而末可理也若逐末以清本必欲窮門市之日售鄉販之零沽複沓詐僞百出不窮雖當以千手千眼之觀世

音恐亦窮於術矣而謂吾以寸紙可鈴轄而杜絕之也此則僕之愚所不敢知者耳

清理鹽課津貼織庫欠項說帖

每綱正票額引共八十萬五千三百九十七引內除肩住票引及溫台靖江定岱等鹽共額引十萬零三千六百九十八引本無津貼一款外又每引減半科則津貼二分五釐之鹽共額引四萬四千七百三十四引應完津貼銀一千一百十六兩零又每引減輸科則津貼一分八釐七毫五絲之鹽共額引三千三百零八引應完津貼銀六十一兩零照額每綱二共應得津貼銀一千

一百七十七兩零餘正引六十六萬三千二百十二引
每引五分照額每綱應得津貼銀三萬三千一百六十
兩六錢統每引五分之正引每引二分五釐每引一分
八釐七豪五絲減科之引每綱照額應得津貼銀大共
三萬三千三百三十七兩零此必額引銷足方合上數
今每年止銷額引七分以上六分以上乃不以年之所
徵報織造徑以額之所定報織造每報皆三萬兩按額
又略短數千此所謂進退失據也在運司衙門以爲此
不過虛報約徵之數每年仍以實徵之數支解並無窒
礙不知織造衙門卽以此報欠之數作爲實數列抵織

庫款項交代儻積引不奉部追繳銷則引在課在虛欠
實抵年復一年爲數亦不至太增原無不可無如此時
將一百五六十萬道積引繳銷則此一百五六十萬道
隨引待徵之津貼胥歸無著矣此無著之項方須設法
清理而可因仍舊例又虛報增三萬兩之數耶爲今之
計宜急急申明從此論年不論綱每年各綱運銷參差不齊本難論綱也
每年實徵實解之外卽無所謂欠數現在截至二十八
年十二月底止除扣解二萬五千餘兩仍存歷年虛報
欠數九萬六百兩零除現擬酌留積引五六十萬道帶
銷約可徵還津貼銀三萬兩外其無引可徵之六萬餘

兩織庫旣已作抵自難毅然豁除應如何歸償之處須妥籌酌議至此後從二十九年起不論綱不報欠目下卽以仍欠九萬餘兩咨報可也

勸捐賑啟

爲勸捐助賑以拯災黎事本年入春以後雨多天寒已苦春收歉薄迨閏四月半後早禾甫將擢穎晚禾尙未插齊而陰霖不止或滂沱竟日或淅瀝連宵時佈密雲罕瞻晴旭以致河湖疊漲積水難消杭嘉湖紹嚴五屬低田俱被淹漫高田亦多沖漾且水浸日久牆傾屋圯沈竈產黿該農民等旣餬口維艱復棲身無所其流離

困苦情形實有不能自存之勢迥非道光三年之災可比此皆由於使者奉職無狀以致恒雨爲災斯民何辜罹茲困阨傷心曷極引咎奚辭現已飭屬將災分頃畝及極次貧戶由紳士耆老暨各莊首詳細查報令印委各員逐一覆勘據實

奏懇

天恩照例分別賑撫均由紳耆莊首分領散放不許書差地保涉手以期災民得霑實惠惟賑撫係有例定月分而自此時以至來年麥熟爲日正長若不預事綢繆量爲接濟則賑撫之後災民將何以爲生爰與督學部

堂織造部堂暨司道府等共捐制錢三萬七千串以爲首倡第災區甚廣集數無多欲延災戶之生須沐仁人之賜因念浙省風俗淳良人多好義當此災民萬分危苦俱係同鄉共井想亦目不忍見耳不忍聞各深惻隱之懷自切解施之願雖本年有田者無租籽可收作賈者亦貨售較滯量入計出在富家豈盡裕如然譬諸有源之水雖挹注其猶堪而廣茲續命之田卽斗升亦有濟查浙省厯屆偏災各紳富皆有捐賑之舉本年災分甚於往年尤宜格外勉力踴躍捐資厥手成擎以惠桑梓其所捐銀錢米穀每處集有若干卽報明地方官於

使者頒發印簿內臚列存記俟賑撫既畢之後照依各莊貧戶或散米或散錢或煮粥分給或買米平糶仍交各莊紳耆莊首經手妥辦總期有凶歲而無飢民以仰副

聖主無使一夫失所至意至災荒助賑捐輸各項議紋本屬定例通行此次凡有捐施俱當恭疏

題報造冊咨部照例辦理如有急公好義捐項較多本院必仿照近年各省成案破格請

獎無論中外官秩升階補缺等項推之花翎

封典之類均可聽本人自行呈明辦理以彰眾善此等

災民飢餒切身一聞富厚有所解施自無不同聲感激
相愛相親是捐賑一事固所以救貧亦正所以保富况
旣敦任卹之誼復邀

獎敘之榮一舉而數善兼全將見指困相贈之風不讓
古人專美從此民咸鳩集野鮮鴻鰥用紓

宵旰飢溺之懷而補天地生成之憾使者於此有厚望
焉

再勸捐賑啟

爲再行懇啟事本年浙省潦患成災災區之廣災情之
重加甚於道光三年而倉庫之支絀又遠不逮於道光

三年故不得已不能不仰望於紳富行業捐貲集腋爲賑撫之助多集得一分捐貲卽多救得一災民性命省城爲各郡領袖殷實者亦較多災情旣重於三年捐數亦必大加於三年乃自使者布啟頒簿以來書者寥寥卽間有擬書者亦尙未滿人望此自使者誠意未能感孚該有司等勸懇不力之故在諸君子勇於赴義雖極其逾分必仍有歉思而使者急於救民卽責以勒捐亦不遑顧恤爲此再行哀懇凡我紳富行業諸公務卽互相勸勉踴躍樂輸多多益善卽日書成救得一分災民卽不啻爲使者懺除一分罪孽也無任翹禱至其間干

百中或有一二難破老慳未孚眾望之人使者亦烏從
肱其篋而探其囊者惟書有曰旌別淑慝表厥宅里淑
與慝法固並行也慷慨者旣當分別

獎敘慳吝者亦不得不示薄懲使者擬於事竣後卽將
眾議未允之人特製爲富不仁扁額一方實釘其人門
首責成地保按月查報不得毀棄是欲貽孫子之謀者
或轉致孝慈之累也此雖使者之過慮浙省風俗淳厚
萬萬不至有此特不敢不先事預告者免致臨時咎使
者言之不早也謹啟